

Colossians
Colossae-areny-rnem-warl
Paul-el pip nhenh thwenek
Colossae
tawen-areny-rnem-warl

Ingwerentyel arrwekel-antey tyaty arrernek, Paul-el Colossae-areny tyaty arrerney-angenh. Paul ingkern-they apetyek. Paul ranem atyetyart irrek ikwer-rnemek. Angkakert-rnem ra thwenek ilerl-apayntetyek, Ephesus-areny-rnem ra thwenek. Ephesus ra anenh apmer ilkwa Asia-ampenyel, Rome-areny-rnem atyetyart anenh. Paul-el awenh ingwer-angkwarr, rernem akalty-anthenh, ilpertenh.

Akalty-anthey-angker apmwamwam mwanty iterl-arey-angenh anenh. Rernem ament-warl ikwer-rnem-kenh akalty-anthenh. Ingwerentyel ikwer-rnem-kenh-angkwarr apententy, rap itethirretyek-arrpantey arrkernelhem. Arrangk-warlap ran. Aker arlkwey-angenh, alakenh rernem iterrenh. Jesus-kenh-angkwarr apentekerr, arraty ingekety.

Paul-el pip ikwer-rnem-warl thwenek, renh-rnem akalty-anthayntetyek angka arraty-angkwarr. Jesus Christ-kenh-angkwarrant rernemap itethirreman. Ament-angkwarr akalty-antheyel arrangwarl, nthakenh itethirrey-angenharl, "Jesus renh tnakenty, ngap itethirreman." Jesus Christ-elant ingkerrenh

itethilem. Ingkartel ahern arrpmernek. Alakenh-they Paul-el angka ikwer-rnem-warl thwenek.

¹ Atha Paul thwenek, Ingkartel ayenh arrernek angkakert Christ Jesus-kenh. Timothy-el-then, Ingkart-kenh-angkwarr apenteyel arrpemar.

² Timothy aylanth pip nhenh thwenem arrekanttherr-warl, Colossae tawenel aneyel-rnem-warl, iylpareth awelheyel-rnem-warl. Akngey anwekantherrenh Ingkartel arrenhantherrenh mwanteyel arntarnt-arem, arrantherr mwerrant-arey anayntetyek.

³ Anantherr arrekanttherr aleth-antey ayerneyel Ingkart Jesus Christ. Ingkartek anwantherr inkwerelheyel, aynikw ikwerenhek.

⁴ Anantherr kel awek, arrantherrarl Jesus Christ tnakeyel, arrantherr Ingkart-areny ingkerrenh arntarnt-arey. Alakenh-anyem anwantherr Ingkartek angkem inkwerelhemel.

⁵ Arrantherr Ingkart tnakeyel, rarl arrwekel ilek, arrantherr iteth intem-antey anayntetyek. Arrantherr angka mwerr-angker Ingkart-kenh awenh.

⁶ Angka mwerr-angker Ingkart-kenh arlpimpirreyel apmer arrpanenh-warl. Rernem apmer arrpanenhek akalty-antheyel. Rernem tnakek inkwerelhemel. Alakenh-anyem arrantherr angka akwerrpel awenh arrpemar, "Ingkart ingkerrenhek ilkelheyel" wenh.

⁷ Artwa Epaprahas-el arrenhantherrenh akalty-anthenh alakenh, "Ingkart ingkerrenhek

ilkelheyel” wenh. Ra Inkart Jesus-angkwarr warrkerrenh, anwantherr warrkerreyel-apeny.

⁸ Ranem arrenhantherrenh akalty-anthenh, Inkart-kenh Itnwengel arrenhantherrenh akalty-anthenh arrpemar, ingwer-rnem-itwek mwerrant-arey anayntetyek. Alakenh-they anwantherr angka awek-anem, arrekantherr-penh.

⁹⁻¹⁰ Alakenh-anyem anwantherr Inkart renh-anem ayerne. Anantherr aleth-antey ikwer angkeyel, arrantherr Inkart-kenh-angkwarr arraty apentetyek, rarl iterreyel-angkwarr, Itnweng Rlwartel arrenhantherrenh akalty-anthetyek, arrantherr arraty iterretyek. Inweng-angkwarr akaltyirreyn-ayntetyek aleth-antey, ingwer-rnem arntarnt-arayntetyek mwerr-angkwarr. Arrantherr artwentyel innga akaltyirretyek angka ikwerenhek.

¹¹ Inkartel arrenhantherrenh rlterrkam-rlterrkileyen. Ingwerentyel arrenhantherrenh apmwewarlilekerr, arrantherr inkwerelhemel aleth apent-ayntetyek ikweren-angkwarrant mwerr-angkwarr-ayteng.

¹² Anantherr-anem Akngetyek inkwerelhetyek, rarl angka arrwekel arrernek, arrantherr apmer alker-itwek aney-alpetyek.

¹³ Ran anwenhantherrenh apmwekety rakek, rantey arrpemar alerikw ikweren arrernek, Atyetyart anwekantherrenh anetyek, anwantherr ikweren-rnem anayntetyek.

¹⁴ Inkart-kenh alerikw ranem anwekantherr katy ilwek, apmwa anwekantherr-wety iwetyek, anwantherr iteth intem-antey anayntetyek.

Alerikw ahern-areny ingkerrenhek anetyek

¹⁵ Anantherr nthakenh Akngey irrwerl-areny arey-angenh. Alerikw ikwerenh atyetyart apmer arrpanenek. Alerikw retangkwel arrwekel anenh ahern-wenyankel. Alerikw ikwerenh ingkerrenhek anayntirrek-anem, Ingart anyent rey-antey.

¹⁶ Rlterrk ikwerenhel ra irrwerl-areny-rnem-then ahern-areny-rnem-then arrpmernek. Aleyarl anwantherr areyel-anem. Ikwer-angkwarr inweng-rnem-then ingkerrenh arrpmernek, nthakenh arey-angenh-rnem. Alerikw rlterrk ikwerenh-angkwarr ra ingkerrenh arrpmernek, atyetyart ingkerrenhek anayntetyek.

¹⁷ Alerikw ra kel anenh, ahern nhenh-wenyankel. Ingartel ahern-areny-rnem-then arrpmerney-angenh-antey, rant anenhan. Alerikwel ingkerrenh-antey atnyeneyel, ahern-areny-rnem ingkerrenh atnyenetyek.

¹⁸ Christ-then Tyaty-areny-rnem anyent-antey, Jesus Christ akapwert-apeny atyetyart aneyel ingkerrenhek. Anyent arlka ikwerenh-apeny anem, inweng anyent-akert rey-antey ikwer-rnem warrkerreyel. Ingartel renh-tangkwel ipmepenh akemelhilek, alerikw ra ingkerrenhek atyetyart anetyek.

¹⁹ Aray, Ingartelant alerikw ikwerenh arrernek, ikwer-apeny anayntetyek Ingart irrkaty-antey ikwer-apeny, anyent rey-antey.

²⁰ Alerikw ikwer-angkwarr alker-areny ahern-areny ingkerrenh ikwerenh-rnem ayerrpilek. Alerikw ikwerenh arwerl iylpeyl-

atherrel ilwemel, ra mwerr-angkwarr mpwarek ingkerrenhek anwantherr apenterl-ayntetyek, mwerrant-arey anayntetyek, arternpel.

²¹ Arrantherr Ingkart-wety ament-warl alhenh. Arrantherr apmwangkwarr alhenh ament iterremel, Ingkart-wety arlkarrirrenh.

²² Alerikw-anem arwerl iylpeyl-atherrel ilwek, arrantherr Ingkart-kenh-angkwarr arraty anetyek. Ra ikwer-warl anyentelhilek, alyelk mwerr anayntetyek, Ingkartel arrenhantherrenh tyatyemeley-angenh.

²³ Arrantherr Ingkart-kenh-angkwarr anetyek, angka mwerr renh rlterrk tnakemel. Arrantherr-anem angkek iylpelirrey-angenh, Ingkartel arrekantherr arrernek, arrantherr iteth intemantey anayntetyek. Ingkartel ayenh rlwanek, angka mwerr-angker Ingkart-kenh ilerl-apayntetyek ahern-areny ingkerrenhek.

²⁴ Ayenh apek menty atwem mwerrarl. Christ Jesus arlka menty anthelhek. Ayeng arlka menty anthelhek arrpemarl tyaty-areny ingkerrenhek.

²⁵ Akngeyel ayenh arrernek, tyaty-areny-rnemek, warrkirretyek, angka ikwerenhe ingkerrenhek akalty-anthetyek, ingkerrenhek warrkirretyek.

²⁶ Arrwekel angka anyelk-tangkwel ayntenh, Aley angka anaynt-anem Ingkart-areny ingkerrenhek, rernem aketh-antey aweyneyel.

²⁷ Ingkart ilkelheyel, arrantherr Jew-weny-rnem akalty anetyek, angka ikwerenhek, arrantherr apmer mwerr-angker-itwek aney-alpetyek, Christ-kenh-angkwarr.

²⁸ Rernem-anem Jesus Christ-warl anyentir-remel, Jesus Christ tnakeyenh. Anantherr renh-rnem akalty-anthem, rernem arraty-angkwarr apenterl-ayntetyek, ingwer-rnemel renh-rnem ilpertilekerr.

²⁹ Christ-el ayenh rlterrkileyel. Alakenh-anyem ayeng warrkirreyel, alhengkerr irrey-angenh. Atha ingwer-rnem akalty-anthayntetyek ipmelhey-angenh.

2

¹ Arrantherr iterl-aretyek ayeng arrekanterr warrkirreyel, ingkerrenhek-antey, ingwer-rnem Laodicea tyaty-areny-rnem-then, ayenh iterl-arey-angenh-rnem-then.

²⁻³ Arrantherr arnkaty anetyek, mwerrant-arey ingkerrenh anayntetyek. Angka anyelk awank-akerr ayntenh rernem iterl-aretyek. Alakenh-anem ingkerrenh akwerrngel Inkart-kenh-angkwarr arraty iterl-arayntetyek. Arrantherr Christ-ek akalty anetyek. Christ ra Inkart-kenh angka ingkerrenhek akalty, arratyant anayntetyek.

⁴ Atha arrenhantherrenh arratyant ileyel, ingwerentyel arrenhantherrenh irrtywerremel ilekerr, akaltyel-arrpantey angka ingwer-angkwarr.

⁵ Ayeng arrekanterr-itwek aney-angenh ar-rangkw, ayeng aleth-antey iterreyel arrekanterr. Ayeng inkwerelheyel, atha awekarl, arrantherr arraty apenteyel, Christ rlterrk tnakemel aleth.

Jesus anyent impen

⁶ Arrantherr Christ Jesus tnakeyel, Ingkart arrekanterr. Kel ikwerenh-angkwarrant apentetyek arrantherr.

⁷ Ikwerenh-angkwarrant akaltyirretyek, alethantey ikwer angkayntetyek. Renh rlterrk tnakayntetyek, anwantherr arrenhantherrenh akalty-anthek-apeny. Rlterrk tnakayntetyek, iylpelirrey-angenh.

⁸ Akalty-arrpantey ingwer-rnem-wety, arrantherr ikwer-rnem-wety arntarnt-arellhetyek, rernem arrenhantherrenh ilpertilekerr apmwewarlilekerr ahern-arenykenh-angkwarr Christ-kenh-angkwarr-wety akngekerr.

⁹ Christ Ingkart anyent rey-antey, inweng anyent-akert.

¹⁰ Christ ra inngarl aneyel anwekantherr-itwel, arrantherr ikwerenh-angkwarr anyentirrek arpemar. Christ rey-antey arrpemar, atyetyart ingkerrenhek aneyel atyetyart ahern-areny-rnemek, irrwerl-areny-rnemek-then.

¹¹ Arrantherr Jesus Christ-warl anyentirrek, arrantherr apmwangkwarr ahern-arenykenh-angkwarr apentey-angenh anayntetyek. Apmwamwam ahern-areny-kenh ament arrpemar. Ra apmwa arrekanterr-wety iwek rlterrk ikwerenhel, arrenhantherrenh itethilek arrpemar.

¹² Rernem arrenhantherrenh baptise-emilek, arrantherr Jesus Christ-angkwarr aylpem-apeny. Arrantherr ilwem-apeny, arrantherr itethirrem-apeny. Arrantherr itethirrek, Ingkart renh rlterrk tnakemel. Arrantherr Ingkart renh tnakek,

rarl Christ renh ipmepenh itethilek

¹³ Awank-akerr arrantherr apmwangkwarrtangkwel apentenh, akwerrp-antey anenh. Arrantherran ipmapeny anenh. Inkartel arranhantherrenh itethilek, Christ-angkwarr, apmwa arrekantherr-wety iwek.

¹⁴ Inkartel anwenhantherrenh menty arek, tyatyemeley-angenh. Apmwa irrarlkek Jesus Christ-el, arwerl iylpeyl-atherrel ilwekel.

¹⁵ Ran arrenty-rnem antengilek arwerl iylpeyl-atherrel ilwemel. Ra arrenty-rnem ywerrelhilek.

¹⁶ Ingwer-rnem apatemel iterreyel Alakenh-anyem rernem angka ingwerek-ingwer ilpertel arrernetyek-arrpantey ahern-areny-kenh-angkwarr, “Nthakenh anwantherr arlkwetyek, nthakenh antywetyek.” Arlta ltyerrey-angker anyentirr-ayntetyek-arrpantey ayntarrp-ileyel.

¹⁷ Inkart-kenh angka arrwekeleny anwantherr arrwekelant apentenh, alyep, arrkay-apeny. Jesus Christ ranem aremirrek. Aleyan ikwerenh-angkwarrant apenteyel aketh innganem.

¹⁸ Ingwer-rnem arraty-arrpantey tnakelheyel, rernem ilelhem “altyerr areyel” wenh, “antyerl-rnem areyel” wenh. Ikwer-rnem-wety arntarnt-arelhetyek, rernem apal-angkwarr apenteyelarlwety.

¹⁹ Aray, rernem Jesus Christ renh ipmek. Christ ra tyaty-areny-kenh atyetyart aneyel, akapwert. Alwerrngel arlka anterrkwem. Arlwerrng-akert arlka rlterrk. Arlwerrng-weny arlka thapelirrem, apekap, nthakenh akngelhey-angenh. Arlwerrng-apeny Christ-el ikwerenh-

rnem ingkerr anterrkweyel, rlterrkileyel arrpe-marl.

²⁰ Arrantherr Christ-angkwarr anyentirrek-apyeny-arrpantey, arrantherr ahern-areny-kenh apenteyel-antey apmwantey. Arrantherr awal-heyel ahern-arenyek, rernem arrenhantherrenh ilerl-anenty, "Alakenh mpwareyel" wenh.

²¹ Rernem ilem, "Ampwal yanh arney-angenh" wenh, "amern yanh arlkwey-angenh" wenh.

²² Amern ahern-areny-kenh arwa aynteyel, apmwirrey-angker. Amern arlkwenty, anamerl ywerrem-anem.

²³ Ingwer-rnem iterreyel ikwer-rnem-kenh-angkwarr mwerr-arrpantey. Rernem irrtywerremel ileyel, arraty-angkwarr anetyek-arrpantey. Alakenh-anyem rernem ywarn arratyirretyek-arrpantey arrkernelheyel. Rernem ywarn-antey ilelhem, rernem mwerr-angkwarr anerl-anenty-arrpantey.

3

Ingkartel anwenhantherrenh itethilek Christ-angkwarr

¹ Ingkartel arrenhantherrenh itethilek, Jesus Christ-angkwarr. Arrantherr-anem Ingkart-kenh-angkwarr anterr iterretyek, Ingkart-kenh apmerek iterretyek. Christ ra Akngey-itwel aneyel.

² Arrantherr-anem anterr iterretyek irrwerl-areny-kenh-angkwarr, ahern-areny-kenh-angkwarr-weny.

³ Arrantherr ahern-areny-wety ywerrek-apyeny, Christ-kenh-angkwarr anyentirremel.

Arrantherr innganem Christ-angkwarr intem-antey iteth aney-alpeyenh. Ahern-arenyel arey-angenh, Inkartelant areyel.

⁴ Ingwer-inger Jesus Christ ra apey-alpeyenh rlterrk innga. Ikwerepenh ingwerel-rnem arrenhantherrenh areyenh rlterrk innganem.

⁵ Alakenh-anyem arrantherr ahern-arenyek inkwerelhey-angenh. Arrantherr apmwangkwarr alheyel-rnemek inkwerelhey-angenh. Arwa alhewer ingwer alwernirrey-angenh anternetyek, apmwangkwarr iterrey-angenh. Ampwal ingwer-kenhek iterrey-angenh inetyek. Alakenh-anyem Inkart-kenh-angkwarr irrtwyerreyelarl.

⁶ Apmwangkwarr alheyel-rnemek Inkart ahelirreyel.

⁷ Awank-akerr arrantherr apmwangkwarrant apentenh.

⁸ Aleyan arrantherr apmwangkwarr apentey-angenh. Ingwer-rnemek ahelirrey-angenh, iltey-angenh, irrentey-angenh anetyek.

⁹ Arrantherr apmwekety ipmelhek. Arrantherr ingwerek irrtwyerrey-angenh.

¹⁰ Arrantherr kel rlengkeny-anem, Jesus-kenh-angkwarr. Inkartel arrenhantherrenh intem-antey akalty-antheyel, rapeny-anem irretyek, akalty innga irretyek.

¹¹ Inkart-kenh-angkwarran arrantherr ingkerr mwerrarl aneyel, apmer ingkerrenh-areny, Jew-rnem-then ingkerrenh, Jew-weny-rnem-then, apmwangkwarr alheyel-rnem-then, warrkenh-rnem-then atyetyart-rnem-then. Mw-

errarl anem, anwantherr ikwer-warl anyentir-rekarl. Christ ra anwekantherr-itwel aneyel.

¹² Inkart arrekanterr ilkelheyel ingkerrenhek. Alakenh ra iwerr mpwarek ingkerrenhek arrwekel-antey, ingkerrenhel renh arraty-angkwarr apentetyek, rernem ingwer-rnemek amperrngirretyek atwey-angenh, rernem tnakelhey-angenh ingkerrenh mwerrant-arey anetyek.

¹³ Arrantherr iparrp anamerl ahelirrey-angenh. Inkart-areny ingwerel arrenhantherrenh iltenty, arrantherr renh ilteyney-angenh. Kel menty renh atwey-angenh, Christ-el arrenhantherrenh menty atwey-angenh-apeny.

¹⁴ Kel mwerrant-arey ingkerrenhek anetyek. Ikwer-penh arrantherr anyent-apeny anem.

¹⁵ Arrantherr ingkerrenh arlka anyent-apeny aneyel, Jesus Christ-kenh. Christ-el arrenhantherrenh ayerrpilek, mwerrant-arey ingkerr inkwerelhetyek. Mwerrant-arey atwerrey-angenh anayntetyek, Inkart ikwer inkwerelhemel.

¹⁶ Christ-kenh angkek iterretyek, arraty akaltyel ingwer-rnem akalty-anthayntetyek, mwerr ilelhemel. Arrantherr aylelhey-angker, psalm-then aylelh-ayntetyek, Inkartek inkwerelhetyek.

¹⁷ Arrantherr angkerretyek Inkart-kenh-angkwarr, arrantherr intem-antey Inkart Jesus-ek iterretyek, Inkart Akngeyek inkwerelhemel, Jesus-kenh-angkwarr.

¹⁸ Arelh-rnem, artwek awelh-ayntetyek. Alakenh Inkart-kenh-angkwarr arraty aneyel.

19 Artwernem, arrantherr anew-rnem mwerr arntarnt-arayntetyek. Arrantherr renh-rnem atwey-angenh.

20 Ampernem, arrantherr aleth amekengkw aynekengkw awelh-ayntetyek, Inkartarl ilkelheyel-angkwarr. Inkart-kenh-angkwarr alakenh ayntheyel.

21 Aynikw-rnem, arrantherr ampernem irrentey-angenh, rernem antwerr alhekerr.

22 Warrkenh-rnem, arrantherr atyetyart-rnemek awelh-ayntetyek intem-antey, rernem arrenhantherrenh areyel-angkwarr, rernem arrenhantherrenh arey-angenh apal aneyel-angkwarr. Inkartel areyel. Inkartek mwerr warrkirr-ayntetyek.

23 Arrantherr iylypareth iytekerr-antey atnwentirrey-angenh warrkirretyek Inkartek, ahern-arenyek warrkirrey-angenh.

24 Arrantherr kel akalty, Inkart rarrp arrenhantherrenh ilek-ilek antheyenh apmer ikwerenh-itwek. Arrantherr Inkart Christ ikwer warrkirrey-alpeyenh.

25 Inkart anyentekant ilkelhey-angenh, ingkerrenhek ilkelherl-ayntetyek. Inkartel ingkerrenh arraty tyatyemileyel.

4

1 Atyetyart-rnem, arrantherr warrkenh-rnem mwantyel arntarnt-aretyek, ilek-ilek arraty an-thayntetyek. Arrantherr atyetyart arrekantherrenh iterl-areyel, irrwerl-they areyellarl-wety.

Akngey ayernetyek ipmelhey-angenh

² Intem-antey Inkart-warl angkerl-ayntetyek, ikwer arrayt iterr-ayntetyek, ikwer inkwerelhetyek.

³ Arrantherr Inkart-warl angketyek, ra ingkerrenh iylpa altyweriletyek, ingkerrenhel angka Christ-kenh arrayt awetyek. Angka anyelk-tangkwel ayntenh. Angka atha ilerl-apenh arwa alhewer. Ingwer-rnem arlkarrirrenh, alakenh ayenh rernem tyayel-warl akwernek.

⁴ Arrantherr Inkart renh ayernenherr-arey, ra ayenh rlterrkiletyek, atha angka anyelk-penh arrayt anayntiletyek ingkerrenhek.

⁵ Arrantherr akwerrp-rnem angka ikwer akalty-anthetyek, rernem iterl-arayntetyek arrpemarl.

⁶ Arrantherr arternp ilayntetyek ikwer-rnem. Rernem arrenhantherr ayernenty, arrantherr renh-rnem arrayt iletyek.

⁷⁻⁸ Artwa Tychicus-el ra atyenh aneyel arrpemarl, Inkartek iylpareth. Ra Inkartek warrkirreyel arrpemarl. Athanem renh arrekantherr-warl thwenem, ra atyeng-iperr ingkerrenhek iletyek, arrenhantherrenh arternpiletyek, atyeng iterrerl-anekerr.

⁹ Onesimus atha thwenem arrpemarl arrekantherr-warl. Ratherr atherrel-antey angka anwekantherr-iperr iletyek.

¹⁰ Aristarchus ra atyeng-itwel aneyel arrpemarl, tyayl-itwek. Ra angka thwenem arrpemarl. Ingwer-rnemel angka thwenem arrpemarl Mark ikwer-penh, Barnabas-kenh ankelikw. Ra apetyenty, arrantherr ikwer inkwerelhem arrpemarl.

¹¹ Jesus itnan ingweran Justus. Artwa Jew irrpety rernemant Jesus Christ renh tnakeyel ar-raty. Rernem anwekantherr-itwek warrkerreyel. Rernem anwenhantherrenh arternpileyel.

¹² Epaphras arrekanttherrenh arppemarl apmer nhak-areny, Jesus Christ-kenh warrkenh arppemarl *Hallo* angkeyel arppemarl. Ra rlterrk aleth Ingkart ayerneyel, ipmelhey-angenh, arrenhantherrenh rlterrkiletyek, arrantherr arraty-angkwarr apenterl-ayntetyek.

¹³ Ayeng akalty, ra arrekanttherr iterreyel aleth, tyaty-areny-rnem ingkerrenhek, Laodicea-areny-rnemek, Hierapolis-areny-rnemek.

¹⁴ Arntety mwerreley-angker wethey, Luke-el angka thwenem arppemarl, Demas-el angka thwenem arppemarl.

¹⁵ Laodicea tyaty-areny-rnem iletiek arppemarl, "Ayeng iterreyel arrekanttherr" wenh, arelh Nympha arppemarl, ingwer-rnem-then meeting-ek akarrirreyel ikwer-warl.

¹⁶ Arrantherr pip nhenh reytemiletiek arppemarl. Arrantherr pip nhenh thwenem Laodicea-areny-rnem-warl, rernem reytemiletiek arppemarl. Arrantherr pip reytemiletiek arppemarl. Pip atha arrwekel thwenek Laodicea-warl, ar-rantherr reytemilemel aretyek, iterl-aretyek.

¹⁷ Artwa Archippus iletiek, "Ingkartek warrkirretyek angka ikwerenh ywerrelhiletiek, akalty-anthemel, rarl ngkweng arrernek-angkwarr-antey."

¹⁸ Ayeng inkwernelheyel angka atyenh, Paul. Atyeng iylpangkenh-arey, ayengarl

tyaylel aneyelek. Inkartel arrenhantherrenh
mwantyel arntarnt-arem.
Kel-antey.

Alyawarr Bible
Portions of the Holy Bible in the Alyawarr language
of Australia

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

PDF generated using Haiola and XeLaTeX on 18 Apr 2025 from source files dated 10 Nov 2023

284d4e02-292d-5bd8-a8a6-8360a307b937